

PROGRAM EVROPSKE UNIJE ZA OPORAVAK OD POPLAVA USPJEŠNO IMPLEMENTIRAN NA PODRUČJU ZENIČKO-DOBOJSKOG KANTONA

Novcem Evropske unije koja je pokrenula **Program za oporavak od poplava u BiH**, u ukupnoj vrijednosti od **43,5 miliona eura**, već je realizovan čitav niz projekata kako na području BiH, Federacije BiH tako i Zeničko-dobojskog kantona.

Od pomenute ukupne sume, za sanaciju šteta od poplava na području našeg Kantona planirano je **4.876.574 eura** i to za rekonstrukciju stambenih jedinica, sanaciju lokalnih puteva i mostova, obrazovnih institucija, objekata za vodosnabdijevanje, opštinske zgrade, centre za socijalni rad i zdravstvene ustanove. Program koji će trajati **do oktobra 2015.** godine implementira **UNDP, UNICEF i Međunarodna organizacija za migracije (IOM).**

Od 4,8 miliona eura opredjeljenih za naš Kanton, **2.042.611 eura** planirano je za rekonstrukciju **stambenih jedinica**, i to za 147 korisnika u Maglaju, 30 korisnika u Zenici i 39 u Žepču. Od ove sume dosad je utrošeno 591.054 eura.

Nadalje, za pojedine općine sa područja Zeničko-dobojskog kantona dosad je investirano **2.302.900 eura** u popravku i rekonstrukciju **javnih ustanova**, u što spada popravka osnovnih i srednjih škola te predškolskih ustanova u Općini Maglaj, zatim popravka osnovnih škola u Olovu, Žepču, Varešu i Zenici te zgrada Opštine Maglaj kao i domovi zdravlja i centri za socijalni rad u Olovu i Maglaju.

Kad je u pitanju **komunalna infrastruktura**, izdvojeno je **205.540 eura** za sistem vodosnabdijevanja u Opštini Žepče, za popravku mostova u Maglaju, Kaknju i Žepču, puteva na području Općina Zenica i sanaciju riječnih korita i vodovoda u Zenici, Žepču i Olovu.

Pored svega pobrojanog, za **ekonomski oporavak privrednih subjekata** čiji su proizvodni pogoni, mašine i oprema stradali tokom majskih i avgustovskih poplava, planirano je da se utroši **296.549 eura**. Ovaj novac namijenjen je za pomoć sedam privrednih subjekata na području Općine Maglaj, tri privredna subjekta iz Žepča i jednog iz Zenice.